

DOMINGU III TEMPU KOMÚN – TINAN B

TEMA

Liturjia Domingu III Tempu Komún nian propoin mai ita kontinuasaun reflesaun hahú tiha ona iha domingu kotuk. Maromak hadomi ema ida-idak no bolu nia ba moris nakonu no loos. Ema ni resposta ba Maromak nia bolun liu husi dalan konversaun pastorál no identifikasaun ho Jezús.

Leitura dahuluk dehan mai ita – liuhusi istória profeta Jonas ne'ebé simu mandatu atu haklaken konversaun ba makhorik Nínive nian – katak Maromak hadomi ema hotu no bolu sira ba salvasaun. Ema Nínive sira nia disponibilidade atu rona Maromak nia apelu sira no halo dalan konversaun sai modelu ida resposta adekuada ba Maromak nia bolun.

Iha *Evanjellu* konvite ne'ebé Jezús halo ba ema hotu mak atu sira sai ninia dixípulu sira no integra an iha ninia comunidade. Marcos aviza katak atu tama iha comunidade Reinu nian presupoin dalan ida “konversaun” nian no adezaun ba Jezús no ba Evanjellu.

Leitura daruak konvida sarani sira atu hanoin katak “tempu liu lais de'it”. Realidade no valór sia mundu nian liu lais de'it nune'e, labele absolutiza sira. Maromak konvida sarani ida-idak, atu fihir metin ba mundu futuru nian – katak, fó prioridade ba valór rohan-laek sira, konverte an ba valór sira “Reinu” nian.

LEITURA I – Jonas 3,1-5.10

“Livru Jonas nian”, provavelmente, ema hakerek iha metade daruak sékulu V mK (karik entre tinan 440 no 410 mK).

Nia istória furak no edificante, maibé la'ós réal. Testu ne'e ita bele klasifika iha jéneru “fiksaun didátika”. Fiksaun mak istória ema inventa ho finalidade atu hanorin no eduka. Nune'e, livru Jonas nian la'ós livru ida ho profeta ida naran Jonas nia liafuan sira, la'ós istóriu.

Ita iha époka mak époka iha-ne'ebé Esdras no Neemias nia polítika favorese nasionalizmu, no Maromak nia Povu taka an ba povu seluk. Husi sorin ida, subliña katak Judá mak Maromak nia Povu eleitu, diferente husi povu seluk; husi sorin seluk konsidera povu seluk mak Maromak nia inimigu, Maromak hirus sira no sira hotu Maromak tenke kondena no hamohu.

Hodi reajen kontra ideolojia dominante, autór “Livru Jonas nian” apresenta Jahwéh nu'udar Maromak universál; nia laran-di'ak no laran-sadia fó ba povu hot, lahó. Hili Nínive nu'udar sidade atu Maromak realiza ninia salvasaun la'ós buat ruma kazuál: Nínive, kapitál impériu Assíria nian hahú husi ukun-na'in Senaquerib, ba makhorik sira Judá nian mak símbolu imperializmu no agresividade aat liu hasoru Maromak nia Povu (kf. Is 10,5-15; Sof 2,13-15). Sidade ne'e mak Jahwéh hakarak salva. Tanba ne'e, Nia bolu Jonas no konvida atu bá Nínive haklaken konversaun. Jonas, hanesan nia maluk sira tempu ne'ebá nian, lakohi atu Jahwéh perdua opresór sira Maromak nia Povu nian no rekuza/lakohi kumpre Maromak nia mandatu. Envezde diriye ba Nínive, iha Oriente, nia sae roo bá Társis, iha Osidente. Iha viajen, aninboot mosu, ema tuda Jonas ba tasi no ikan boot ida tolan nia. Ikan ne'e lori nia no muta sai nia ba rai. Maromak bolu Jonas dala ida tan ba misaun iha Nínive.

MENSAJEN

Ita-nia testu hahú ho Jonas simu mandatu daruak husi Jahwéh atu bá Nínive. Oras-ne'e, Jonas aseita misaun, bá iha Nínive no haklaken sidade nia destruisaun. Ema Nínive sira rona, no kontráriu ba hanoin tempu ne'ebá nian, halo peniténsia no hatudu vontade konversaun nian. Maromak deziste atu fó kastigu ba sira.

Lisaun dahuluk “ai-kanoik” ne'e nian mak universalidade Maromak nia domin nian. Maromak hadomi ema hotu, laho esesaun, no ba sira hotu nia haraik nia laran-di'ak no laran-sadia. Ema aat, ema lajustu no opresór sira mós Maromak hadomi no oferese ba sira possibilidade salvasaun nian. Maromak la hadomi salan, maibé hadomi ema sala-na'in. Nia lakohi ema sala-na'in mate, maibé atu nia konverte an no moris.

Lisaun daruak ita-nia “ai-kanoik” nian mai husi ema Nínive sira-nia resposta ba Maromak nia dezafiu sira. Hodi haktuir oinsá ema Nínive nian tuir kedas ho radikál “fiar iha Maromak” no konverte an “husi sira-nia dalan aat” (kontáriu ho buat ne'ebé dalabarak akontese ho Maromak nia Povu rasik), autór sujere, ho ironia uitoan, katak ema jentiu sira-ne'e, ne'ebé Povu Maromak nian konsidera nu'udar aat, prepotente, lajusutu no opresór iha kapasidade atu sai atentu liu ba Maromak nia dezafiu sira duké Povu eleitu rasik.

Autór istória nian denunsia vizaun nasionalista, patikularista, ezkluzivista, senófoba, ne'ebé sai moda iha ninia époka. Nia sadik Povu atu aseita katak Jahwéh mak Maromak laran-sadia ida, ne'ebé oferese ninia domin no ninia salvasaun ba ema hotu, até ba sira-ne'ebé aat. Nia dezafia mós makhorik sira Judá nian atu asume Maromak rasik nia lójika – lójika laran-di'ak nian, laran-sadia nian, perdaun nian, domin laho limite – no la haree ema seluk hanesan funubalu ne'ebé merese atu hetan destruisaun, maibé maun-alin sira atu hadomi.

LEITURA II – 1 Cor 7, 29-31

Surat rua ba ema sira Corinto nian– liuliu ida dahuluk – reflète realidade comunidade joven ida nian, dinámika no ho entuziazmu, maibé ho ninia problema no difikuldade rasik... Naroman no nakukun sira mak rezultadu, husi parte ida, tanba nia mak comunidade ida husi mundu gregu – katak mundu animadu no estruturadu husi dinamizmu rasik, ho vitalidade boot, maibé tempu hanesan ho valór no dinámika ne'ebé halo sai difisil transplantasaun valór evanjéliku sira ba mundu ho prinsípiu diferente liu, husi ida-ne'ebé sai baze mensajen sarani. Iha comunidade sarani Corinto nian, ita haree difikuldade fiar sarani nian atu integra an iha ambiente ida inimigu nian, marka ho kultura jentiu no ho valór lubuk-ida ne'ebé kontráriu tebes ho mensajen evanjélika.

Setór ida iha-ne'ebé nota maka'as nu'udar xoke entre fiar sarani no kultura elénika mak kestaun sira étika seksuál nian. Iha ámbitu ida-ne'e, kultura Corinto nian nakdoko iha estremu rua: husi sorin ida, laxizmu (la kontrola an, hanesan baibain akontese iha sidade marítima ida, iha-ne'ebé to'o mariñeirur sira husi mundu tomak no iha-ne'ebé ukun Afrodite, maromak-feto domin nian Grécia nian); husi sorin seluk, desprezu absolutu ba seksualidade (típiku tendénsia filozófika ruma nian ne'ebé hetan influénsia husi filozofia platónika, ne'ebé konsidera matéria nu'udar buat aat no halo hahalok la kaben nian nu'udar ideál absolutu).

Paulo nia hakaran mak apresenta dalan ida ne'ebé iha ekuilíbriu: kondensasaun ba forma hotu dezorden seksuál hotu, defeza valór kazamentu nian, elojiu/hahí selibatu (kf. 1 Cor 7).

Provavelmente, sarani sira Corinto nian konsulta Paulo kona-ba dalan ne'ebé di'ak liu atu tuir – kazamentu eh selibatu. Paulo hatán ba kestaun ne'e iha kapitulu 7 Surat Dahuluk ba Corinto oan sira. Paulo konsidera katak kona-ba buat ne'e, nia la simu “ukun-fuan ida husi Na'i”;

maibé ninia hanoin mak ema ne'ebé la kompromete an ho kazamentu kontinua nune'e no ema ne'ebé kompromete an keta "hakotu uniaun" (1 Cor 7,25-28).

MENSAJEN

Iha Paulo nia perspetiva, sarani sira labele haluha katak "tempu liu lalais" (badak), bainhira sira tenke halo sira-nia opsaun sira, kona-ba hili kazamentu eh selibatu. Iha konkretu signifika sá loos?

Sarani ida moris iha realidade rai nian, maibé nia la moris ba buat sira-ne'e. Nia hatene karak realidade rai nian liu lalais no tranzitóriu no labele halo sira nu'udar buat ruma absolutu. Ba sarani sira, buat ne'ebé fundamentál no tenke tau iha fatin dahuluk mak realidade moris rohan-laek nian... Sarani ida maski estima no hadomi realidade sira mundu nian, nia bele hewai sira tanba di'ak ida boot liu. Importante liu, ba sarani ida, mak nafatin domin ba Kristu no adezaun ba Reinu. Buat seluk (maski importante liu) iha rohan-laek nia okos.

Iha ninia katekeze ba sarani Corinto nian, apóstolu aplika prinsípiu sira-ne'e ba kestaun kazamentu/selibatu. Ba nia, kazamentu mak realidade importante ida (nia konsidera katak kazamentu no selibatu mak don Maromak nian – kf. 1 Cor 7,7); maibé realidade rai nian ne'ebé liu, tanba ne'e, labele absolutiza. Paulo nunka dehan katak kazamentu mak realidade aat ida eh dalam ne'ebé tenke evita; maibé evidente, iha ninia liafuan sira, predilesaun ba selibatu... Iha ninia perspetiva, selibatu fô vantajen nu'udar dalam ne'ebé hatudu ba realidade rohan-laek: haklaken moris foun resurreisaun nian ne'ebé hein ita, tempu hanesan fasilita servisu efikás ba Maromak no maun-alin sira (kf. 1 Cor 7,32-38).

Paulo nia liafuan vale ba tempu no fatin hotu; maibé nia iha lójika se ita tau iha neon katak comunidade dahuluk sira moris ambiente eskatolójiku. Ba sarani sira ne'ebé Paulo dedika Surat Dahuluk, ba sarani sira Corinto nian, Jezús nia mai ba dala rua besik ona: tanba ne'e presiza relativiza realidade tranzitória no liu lalais sira, no entre sira-ne'e mak kazamentu.

EVANJELLU – Mc 1,14-20

Parte dahuluk Evanjellu nu'udar Marcos haktuir (kf. Mc 1,14-8,30) nia objetivu fundamentál mak deskoberta Jezús nian nu'udar Mesias ne'ebé haklaken Maromak nia Reinu. Ho ninia katekeze, Marcos konvida lee-na'in sira Evanjellu nian atu akompaña Jezús nia revelasaun, atu rona Ninia liafuan no anúnsiu sira, atu sai dixípulu sira ne'ebé adere ba ninia proposta salvaun nian. Deskoberta Mesias nian ne'ebé katekista Marcos propoin remata iha Mc 8,29-30, ho konfisaun mesiánika Pedro nian, iha Cesareia Filipe nian: "Ó mak Mesias".

Testu ne'ebé ohin propoin mai ita mak inísiu dalam atu hasoru Mesias no ninia anúnsiu salvaun nian. Iha testu ne'e, Marcos apresenta ba ninia lee-na'in sira ain-hakat dahuluk sira Mesias libertadór nian.

Fatin jeográfiku testu nian mak Galileia – rejiaun ida ne'ebé iha kontaktu nafatin ho jentiu sira no, tanba ne'e, autoridade relijioza sira Jerusalém nian konsidera nu'udar rai ida iha-ne'ebé "labele mai buat di'ak ida".

MENSAJEN

Ita-nia testu fahe ba parte rua. Iha parte dahuluk, Marcos apresenta rezumu ida pregasaun inisiál Jezús nian (kf. Mc 1,14-15); iha parte daruak, ita-nia evanjelista apresenta ain-hakat dahuluk comunidade dixípulu sira-nian – comunidade Reinu nian (kf. Mc 1,16-20).

Iha rezumu badak Jezús nia pregasaun insiál nian, Marcos tau iha Jezús nia ibun liafuan sira tuirmai: “Tempu to’o ona, Maromak nia Reinu besik ona. Hakribi imi nia salan hodi fiar Evanjellu” (Mc 1, 15).

Espresaun “tempu to’o ona”, ne’ebé Marcos uza iha gregu ni’udar “kairós” refere ba tempu ida diferente husi tempu materiál – “chronos”, iha gregu – tempu ne’ebé sukat ho relójiu. Ita bele tradús nu’udar “tuir projetu salvasaun ne’ebé Maromak iha ba mundu, to’o ona momentu ne’ebé Maromak determina atu kumpre ninia promesa sira”. Ne’e mak tempu “Maromak nia Reinu” nian.

Israel nia katekeze refere nafatin ba Jahwéh nu’udar liurai ida ne’ebé, tuur iha nia tronu, ukun nia Povu. Bainhira Israel hahú iha liurai, ba Israel nia mak ema sira ne’ebé Jahwéh hii no tau mina atu ukun Povu, hodi Maromak nia naran, liurai loloos nian. Ezemplu típiku liurai/atan ida, ne’ebé ukun Israel hodi Jahwéh nia naran, submete an tomak ba Maromak nia vontade mak David. Saudade ba liurai ideál ida-ne’e no tempu ideál dame no ksolok nian iha-ne’ebé Jahwéh ukun (lihusi David), marka istória futura Israel nian. Iha tempu krize no frustrasaun nasional nian, bainhira liurai aat sira lori nasaun ba dalan sira mate no desgrasa nian, Povu mehi ho David ne’ebé fila hikas ho ninia glória. Profeta sira, husi nia parte, aumenta Povu nia esperansa, hodi haklaken tempu futuru iha-ne’ebé, Jahwéh sei ukun hikas Israel no lori fali situasaun ideál tempu David nian. Misaun ida-ne’e, iha perspetiva profétika, sei entrega ba ida-ne’ebé Maromak “kose mina” (Mesias iha ebraiku, Kristu iha gregu). Nia sei lori tempu ida dame nian, justisa nian, moris di’ak nian, ksolok rohan-laek nian – katak tempu “Maromak nia ukun nian”.

“Maromak nia Reinu” mak liafuan ne’ebé rezume Israel nia esperansa iha mundu foun, dame no moris naresin nian, Maromak prepara ba nia Povu. Esperansa ne’e moris iha Israel nia fuan iha tempu Jezús mosu ne’ebé hateten: “Tempu to’o ona, Maromak nia Reinu besik ona”. Jezús nia espresaun balun iha Sinótiku sira, hatudu katak Nia iha konxiénsia kona-ba ninia ligasaun ho Reinu no Reinu atu to’o depende ba ninia asaun.

Jezús hahú ho konstrusaun “Reinu” ne’e nian hodi husu konversaun (“metanoia”) no akollimentu Liafoun Di’ak nian (“evanjellu”) ba nia maluk sira

“Konverte an” signifika nakfilak mentalidade no hahalok sira, asume atitude baze foun, reformula valór sira ne’ebé orienta moris rasik. Signifika tetu moris hodi tau Maromak iha sentru no okupa fatin dahuluk. Iha Jezús nia persptiva, sei laiha mundu foun domin no dame nian se ema la hakribi egoízm, foti-an, autosufisiénsia hodi hakat ba rona fali Maromak no ninia proposta sira.

“Fiar” la’ós de’it aseita lialoos intelektuál sira lubuk-ida; fiar mak, liuliu, adere ba Jezús, rona ninia proposta, simu iha fuan, halo nia sai matadalan moris rasik nian. “Fiar” katak rona “Liafoun Di’ak” salvasaun no libertasaun nian (Evanjellu) ne’ebé Jezús propoin no halo nia sai sentru moris tomak nian.

“Konversaun” no “adezaun ba Jezús nia projetu” mak oin rua doit ida nian: konstrusaun ema foun nian, ho mentalidade foun, ho valór foun, ho postura vitál foun. Jezús nia liafuan hotu mak ne’e: atu moris mai ema foun ida ho kbiit atu hadomi maluk sira (Mt 22,39), nia funu-balu mós (Lc 10,29-37); atu moris mai ema foun ida, ne’ebé la moris ba egoízm, ba rikusoin, ba soin materiál sira, maibé ba partilla (Mc 6,32-44); atu moris mai ema foun ida, ne’ebé la moris atu hetan podér no domíniu, maibé atu serví no saran an (Mc 9,35). Nune’e de’it mak iha hetan mundu foun – “Maromak nia Reinu”.

Depoizde hateten sá loos Jezús nia proposta inisiál, Marcos apresenta mai ita dixípulu dahuluk sira. Pedro no André, Tiago no João mak – iha Marcos nia versaun – ema dahuluk sira atu hatán ho pozitivu ba dezafiu Jezús apresenta. Ida-ne’e signifika katak sira dispostu atu “konverte an” no “fiar Liafoun Di’ak”.

Iha Marcos nia katekeze kona-ba vokasaun, nia sujere katak:

1. Bolun atu tama iha komunidadade Reinu nian mak nafatin Jezús nia inisiativa ida diriye ba ema konkretu sira, “normál” sira.
2. Bolun ne’e ejzijente, radikál (Jezús la “prepara” molok bolu, la esplika buat ida, la fó garantia ida no hateke fila atu haree se ema sira ne’ebé nia bolu hatán eh lae ba ninia dezafiu).
3. Bolun ne’e la’ós atu tuir lisaun husi mestre narnaran ida, atu aprende no repete dotrina ida; maibé bolun ida atu adere ba Jezús, atu halo ho Nia esperiénsia ida moris nian, atu aprende ho Nia sai ema foun ne’ebé moris iha domin ba Maromak no ba maluk sira.
4. Bolun ne’e ezije resposta kedas, totál no laho kondisaun, husu atu tau uluk dixipuladu molok buat seluk no integra an iha komunidadade Reinu nian.